



Шочмо эл, порылык да чын верч!

Б У Д Ъ Г О Т О В /

19-ше (3770) №,
2026 ий 15 май,
кугарня



0+

Ймде лий

1933 ий 1 февраль годсек лектеш.

15 май – Ешын тўнямбал кечыже.



Йоча пелен пеледалтат

Мландыш изи нёшмё камвочмеке, у кушкыл шочеш. Тудо, вуйжым кече дек нёлтен, кажне кечын кушкеш. Виян лийже, мардеж деч ынже лўд манын, мо арала? Мутат уке, вожшо. А мемнан вожна – пагалыме еш, эн ўшанле энэртыш. Лач ешыште куан ден ойгым пырля пайлат, йоратыме кочкышет, книгат, модышет нерген палат. Нелылыкыш логалме-

ке полшат, тургыжланат. Кажне сенгымашетлан йывыртат. Икманаш, илышетын кажне татыштыже пеленет улыт.

Еш изи сандалыкым ушештара. Эсогыл тудын – шке йылмыже, тудым вес ег умылен ок керт. Кажне ешын ойыртегалтше йўлажат уло. Чылажат – ача-аван кидыштыже. Лач нунылан кўра изи икшыве куаным, пиа-

лым шижеш. А ача ден ава-влак йочашт пелен шошымсо пеледыш семын пеледалтыт, шулдырангыт. Тыгак ойлаш лиеш Шернур район Аптулят ялыште илыше самырык Таныгинмыт еш (снимкыште) нерген.

Фотом еш архив гыч налме.

Умбакеже 6-шо лаштыкыште лудса.

ПОДПИСКЕ

Пагалыме ача-ава, коча-кова, туныктышо, йоча-влак! 2026 ийын кокымшо пелийжылан «Ймде лий» газетлан подпискым ышташ вашкыза. Индекс – П4696. Ак: 517 тенгеат 86 ыр. Тыгак редакций гоч газетлан возалташ лиеш: ак – 200 тенге.

Рекламе.

Российысе увер

14-16 ияш йоча-влак «Ледокол Знаний» проектыш ушнен да ледоколыш ўжмашым сенен налын кертыт. 24 май марте кум танасыште шинчымашым тергыман. Тұрыс увер – polus.atom.online сайтыште.

«Чудеса народных промыслов России. Олимпиада» всероссийский акцияш ушнаш шонышо-влак 15 июнь марте йодмашым пуышаш да заданийлам ыштышаш ултыт. Кумданракын – культура.дворян.рф сайтыште.

«Искусственный интеллект открывает Россию» конкурсшто нейросеть дене ыштыме сўрет-влакым аклат. Шочмо элнан моторлыкшым почын пуышо паша-шамычым 1 июнь марте вучат. Тұрыс уверым налоговый.колледж.рф сайтыште лудса.

Марий Элысе увер

Йошкар-Оласе Бауман лицей черетан 10-шо медиаклассым пога. Журналистикылан шўман, 9-ше классым тунем пытарыше ўдыр-рвезе-влакым 22 июньшто 10 шагатлан тыгай адрес дене вучат: Йошкар-Ола, Кремлёвский урем, 44 пōрт. Тұрыс увер – my18.ru сайтыште.

Республикысе йоча да самырык-влаклан технике усталык рўдер 1-26 июньшто «ТехноСтарт» кенез фестивалыым эртарат. Ўдыр-рвезе-влак 13 модуль почеш ушакылыштым яра пойдарен кертыт. Тидлан p12.навигатор.дети сайтышке йодмашым колтыман.

28 майыште Республикысе йоча да самырык-влаклан В.Х.Колумб лўмеш книгагудышто «Колумб лудмаш – 2026» оласе конкурс лиш. Сенгыше-влак 26 июньшто Моркышто эртаралтыше регион-влак кокласе сылнымут фестивалышке ушнен кертыт.



Кажне буква уверым арала

«Патриотическая азбука глазами детей» ончерым 9 майыште Йошкар-Олаште «Герои Отечества» тоштер-патриот рўдерыште почыныт. Тудым рўдоласе 1-ше номеран школышто 10-шо классыште тунемше кандаш чолга ўдыр ямдылен.

– Шкешотан азбукым март гыч май марте чумыреныт. Кажне буквалан патриот теме дене кылдалтыше мутым кычалыныт. Мутлан, «А» – Александр Матросов, «Г» – Николай Гастелло. Талешке-влакын ылыш корныштым шымленыт, подвигыштым палемденыт. «Д» буква Ленинград

оласе блокаде дене кылдалтын, тудым «Дорога жизни» манын лўмденыт. Сўрет-влакымат шке кельиштареныт. Калык фронтын сўретчыже Владимир Николаевич Коптелин тўрлен, – оила Йошкар-Оласе 1-ше номеран школ директорын воспитаний шотышто советникше Диана Анатольевна Тихонова.

Ўдыр-влакын пашаштым ончаш вашкыза. Ончер май мучко кумулан-влакым вуча.

Оля МАЙКОВА.

Фотом Марий Элысе Образований да науко министерствын «ВКонтакте» воткылысе тўшкаж гыч налме.

Корнышто – самырык инспектор

Морко районышто «Корнысо самырык инспектор» (ЮИД) конкурс эртаралтын. 1-ше номеран Морко школышто 4-ше «А» классыште тунемше-влак мый, Артем Иванов, Карина Васильева да Давид Ростомян (снимкыште) тушко ушненна. Корнышто коштмо правил-шамычым палымынам, икымше полышым пуымаште шинчымашнам тергенна, велосипед дене чын кудадышт мошты-

мынам ончыктенна. Тыгак творческий конкурс лийын. Тушто мемнан команде икымше верым сенен налын.

Тўн конкурсшто 2-шо номеран Морко школын командыже сенышыш лектын. Тудо районын чапшым «Лўдыкшыдымō орава-2026» республикысе конкурсшто аралаш тўналеш.

Оля ВАСИЛЬЕВА.

Фотом школ архив гыч налме.



Латик ияш рестораным почын

Козьмодемьянск олаште илыше Мария Князева (снимкыште) 11 ияш веле гынат, ешыжым тамле кочкыш дене сийла, йодмо почеш тортым кўэштын ужала, эсогыл рестораным почын. Ушанеда?

– Шкемым мыняр шарнем, кочкышым ямдылаш эре полшенам. Кузурак-влакын ыштымыштым ончен, изин-изин тунемьянам. Иктаж-мом пален омыл гын, интернетыште кычалынам. Шке гыч ямдылаш иктаж шым ияш улмем годым тўнгалынам. Эн ондак повар лияш шоненам. Но мыланем вуйлаташ утларак келша, садлан шке рестораным почаш кумыл лектын, – ойла ўдыр.

Яра сийла

Мария куд икшыван кугу ешыште кушкеш, тудо визымшыже. Жапше лийме годым ача-аважым, иза-акаже-влакым ресторанысе гай кочкыш дене сийла. Моторын талингашке опта, сораастара. Шукерте огыл монгыштыжō изи рестораным почын.

– Чын рестораным почаш йōнем уке, эше изи улам, но тудын лўмжō верч кызытак тыршем. Ресторанем нерген палышт маньын, ик соцкылысе блогыштем кажне кечын гаяк каласкалем, авамат вўдаш полша. Миллион дене еñ погына гын, ресторанемат чылан палаш тўнгалыт. Лиеш маньын, ўшаненамак. Ресторанышкем кумылан кажне еñ эше пурен ок керт. Кызытеш лишыл енем-шамычым веле пукшем. Яра. Кочмыштан фотом ышташ да тидын нерген интернетыште палдараш йодам. Кочкыш утыждене тамле лийын



гын, копилкыш чаевой манмым пышташ лиеш. Ресторанем эше кофейне гай веле коеш: ўстембал да пўкен. Тўрлō оборудованный кўлеш. Лишыл жапыште морозилкым налаш шонем, – палдара Мария.

Икымше торт

Мария шукерте огыл тортым кўэшташ тўнгалын. Эн ондак ешыжым веле сийлен. Икана аважын йолташ ўдыржō Лариса Саламатина толын, да торт моткоч келшен. Тудо уста ўдыр нерген палымыже-шамычлан каласкален. Тыге 25 январьыште икымше заказ лийын.

– Келшаш моткоч лўдмашан ыле. Тыгай увер авамым эшеат чот брыктарен. Но йодшо еñ йоча улмемым раш умылен. Кеч-могай тортым налаш ямде лийын. Кызыт заказем шагал огыл. Блогысо подписчикем-влак ике йодыт. Мый нуным йōршыш омпале, ўшанымыштан мот-

коч тауштем. Тортым ыштен ужалыме окса дене формым, йōрварым наледем. Интернетысе йолташем-шамычат пōлекым ышташ. Моско гыч адвокат, юридический шанче кандидат, радиовўдышō Шота Олегович Горгадзе эсогыл чапле духовкым пōлеклен. Ынде у дизайным шонен, иканаште шуко коржым кўктен кертам. Моткоч тауштем, – ойла Мария.

Торт деч посна ўдыр мелнам, маффиным, «Картошка» пироженыйым кўэштеш. Шукерте огыл блогысо ик кондитер пончикым, леденцым, жевательный кампеткым ышташ тунуктымо курсым пōлеклен. Лишыл жапыште Мария ты курсым эртынеже. Тыгак меренговый рулетым ышташ, пюре шўрым ямдылаш, киндым пышташ тунемнеже.

Шонымашет шукталтше!

Мариян эше ик кугу шонымашыже шукталтын. Шукерте огыл тудым ресторанысе кухньыш экскурсий дене ўжыныт.

– Моткоч чот тургыжланенам, но шкемым пиаланла шижынам. Рестораныште чылажат кугу. Тыгай конгам, миксерым эше ужын омыл. Ача-авам эн кугу энэртышем улыт. Шонымашем шукташ эре полшат. Ыштышааш пашам моткоч шуко, но тунеммаш садак ончыл верыште. Кочкышым ямдылымаш шуко жапым, вийым налеш гынат, чыла шукташ тыршем, – манеш ўдыр.

Мария Князеван блогшым мыят шукертсек кугешнен эскерем. Тек чыла шонымашыже шукталтеш!

Христина АЛЕКСАНДРОВА.
Фотом еш архив гыч налме.

Пошкудо калык



Школыштына чуваш калыкын тўвыражлан пōлеклалтше мероприятий эртаралтын. Кумшо классыште тунемше-влак (снимкыште) пошкудо калыкын эртыме корныжо, йўлаже, усталыкше дене палыме лийыныт. Чуваш калык вургем, кажне тўрын мом ончыктымыш нерген шуко онгайым пален налыныт. Ойыртемалтше кочкышыштым тўткын онченят,

тудым кузе ямдылыме радамым шарнен кодаш тыршенят. А калык модыш дене модын, капкылыштым шуареныт, вуйыштым кандареныт.

Тыгай мероприятий моткоч кўлешан. Вес калыкым пагалаш тунукта да тўняумылымашым кумданга.

Н.Г.ВОЛКОВА.
Шернур, Лажвьял.
Фотом школ архив гыч налме.



Сөрал пагыт

Тольо сылне шошо
Марий Элышкем.
Кондыш тудо шокшым
Да лыжга мардежым,
Писе кайык-влакым
Да пеш шуко вўдым.
Мландын лавыражым
Мушкын колтыш тудо.

Вучышна пеш ятыр
Тиде сылне жапым.
Капкылна куаныш,
Нўлтыш кумылнам.
Пеш вашке пеледыш
Йырымваш пеледе.
Ах, улат тый, шошо,
Ныжыл, канде, ошо.

Э.О.ВАСИЛЬЕВА.
Звенигово, Кужмарий.

• Палаш онай •

✦ Тўнямбалне 110 наре тўрлў лудо уло, Российыште – 30 тўрлў.

✦ Ты кайыкын йолыштыжо нерв уке, садлан тудо ны шокшым, ны йўштым огеш шиж.

✦ Ава лудо йўкым чотрак луктеш, узо гын, шыпрак.

✦ Лудиге, муно гыч лекмеке, кўм ончыч ужеш, тудым авалан шотла.

✦ Кайык вўд йымак пура гынат, капше кукшо.



Алїша ТИМОФЕЕВЫН сўретше.
Волжский, Сотнур.

199 ПЫСТЫЛЫН ОЗАЖЕ

Пўртўсым шымлаш кумылан-влак шонымашыштым тўрлў семын шуктат. Икте фотографийым ышта, весе кушкыл-влакым шында, эскераш тунемеш, кумшо коллекцийым кельштарат. Йошкар-Оласе 27-ше номеран школышто 9-ше классыште тунемше Софья Пирогова (снимкыште) кайык пыстыл-влакым пога.



Ныл ий ончыч соцкылыште Ксения Орёл-Пушкарёва дене палыме лиймеке, ты онай хобби деке шўмангын. Ксения – республикыште ик эн опытан коллекционер да Российысе кайыкым аралыме ушемын координаторжо. Тудо Софьям погымо пашалан туныктен, кажне татше нерген каласкален, тыгак бёрдвотчинг нерген умылтарен.

– Пыстылым мландымбалне чўчкыдын муаш лиеш. Тудым зип-пакетыш пышетем, маркер дене жапым да кундемнын лўмжым возем. Вара справочник-влак полшымо дене пыстылын озажым пален налап. Эрыктыме дец ончыч пыстылым кылмыкташ кўлеш. Вара шовын дене леве вўдеи мушман. Кошкымеке, пыстылым шарыман. Копиангге-влак коллекцийым ыныит тўкў манын, тудым герметичный пакетыште але контейнерыште аралыман, – палдара Софья.

Марий Эл Республикыште 250 наре кайык ила. Софья кажныжын пыстылжым муаш шона. Кызыт тудын коллекцийыштыже тыште да вес кундемлаште илыше кайык-влакын 199 пыстылышт уло. Тыгак ўдыр вашлийме шулдыран йолташ-шамычын фотографийыштым войза, сўретым сўрет-

ла. Шукерте огыл Тимофей Евсеев лўмеш Калыкле тоштерыште «Про перо» ончер эртаралтын. Тушто Софьян коллекцийже гыч ужашым ончаш лийын.

– Тиде мыйын икымше ончере. Ончышо-влаклан онай лийже манын, пыстыл-влакым кагазеш пижыктыме, кайыкын лўмжым возымо, фотографийжым кельшитарыме. Кажне пашам мыланем шергакан, но купчывын пыстылжым мумеке, чот йывыртенал ыле. Тыгак фазанын пыстылжыже мотчок мотор. Пыстылым погышо-влак шукын улыт. Интернетыште ятыр тўшкам эскераш лиеш. Тушто коллекцийым ончаш, икте-весе дене пыстылым ваиталтылаш да ик шонымашан йолташ-влакым муаш йўн уло, – оила ўдыр.

Катя СЕРГЕЕВА.
Авторын фотожо.

М Бёрдвотчинг – кайык-влакым пўртўсыштў, илыме верыштышт эскерымаш.

Артист койышан шырчык

Кече шыратен онча. Шыргыжал-мыж дене куандарен, уремышке ўжеш. Шўжарем дене коктын сад-пакчашке лекна. Лўнгалтышыш шична да кавашке ончена. Кенета пырысиге магырымыла шоктыш. Йырымваш ончална – ныл йолан йолташ нигушто ок кой. Шукат ыш эрте – ужаван йўкшў пылышлан солныш. Воктене пўят, ерат, купат уке. Ала омо конча, шоналтышым. Коваштемым чывыштальым. Уке,

ом мале. Шолашке савырнен ончална – олмапу укшышто шырчык шинча. Теве мо тыгай артист койышан улмаш! Шўжарем дене шыргыжал колтышна. Ынде эшеат тўткын колышташ кумыл лекте. Шулдыран йолташ варашлат кычкыра, варакарсимлат чогымата. Ну кертеш вет! Тетла вес тыгай мастар кайык уке, шоналтышым.

Алина СУББОТИНА.
2-шо номеран Морко школ.



Лаштыкым
Катя СЕРГЕЕВА
ямдылен.



«Акбузат» – башкир йочан йолташыже

«Ямде лий» газетыш возен шогышо чолга ўдыр-рвезе-влакым ме «юнкор» але «юный корреспондент» манына. А Башкортостан Республикыште савыкталтше «Акбузат» журналыш серышешамыч «юный шагитовец» семын палыме улыт. Ты лўмым «Я – юный шагитовец» медиашколым тунем лекше йоча-влак нумалыт. Медиашколым журналын тўн редакторжо Лариса Хашимовна Абдулина (снимкыште) вуйлата.



паша дене лектедена. Республикан тўрлў районжо гыч возен шогышо йоча-шамычым 2024 ийыште иквереш погенна. Ты пашам Башкортостан Республикын Главажын грант-шамыч фондиш полшымо дене шуктенна. Вич кече жапыште 4-14 ияш ўдыр-рвезе-влакым видео ден фотографийым войзаш, башкир йылме дене текстым чын да раш сераш, соңкылыш пост-шамычым луктедаш туныктенна, журналым ямдылыме радам дене палдаренна.



на. Медиашколын лектышыжым 44 лаштыкан «Я – юный шагитовец» сборникеш савыктымме, – ойла Лариса Хашимовна.

Азалия Фаздалова ден Зульхиза Юсупова медиашколын чолга тунемшыже улыт. Ўдыр-влак кок тўрлў районышто илат. Башкир тўвыра дене палдараш ямде улыт!

Фотом еш архив гыч налме.

«Шагитовец» мут Шагит Худайбердин дене кылдалтын. Башкортостан Республикыште тудын лўмжым нумалше Правительственный премий журналистикыште ойыртемалтше-влаклан пуалтеш.

Калык тўвыра – курчакыште

Шочмо Илишевский районныште ятыр уста шўлышан ег ила. Шукерте огыл мый Верхнеяркеево селаште ильше Аниса Галимовна Саттарова дек унала миенам (снимкыште). Тудын мастер кидше тыглай арверым мотор, башкир илыш-йўлам почын пуышо курчакыш савыра.



тўвыра вет тыгай поян! Мый ишкеже Аскинский район гыч улам гынат, Верхнеяркеевыште ятыр ий илем. Илишевский районым пагален, Илиш-бавай (коча) ден Илиш-кызы (ўдыр) курчак-влакым ыштенам. Ўдырлан

районын флагише да гербише сынан шўртнялге-пелганде тўсан тувырым чиктенам, – ойла Аниса Галимовна.

Аниса апан (кокан) усталык корныжо школ кружок гыч тўнгалын. Тушто тудо икымше курчакым ыштен. Кызыт Аниса Галимовна сулен налме канышыште, сандене йўратыме кидпашалан уло яра жапшым ойыра.


– Ковамым шарналтен, шочмо калыкемым тўвыраж нерген шонкалаш тўнгалынам. Башкир

Кидмастарын эн палыме курчак коллекцийже «Урал Батыр» башкир эпослан пўлеклалтын. Акрет годсо герой-влак ятыр ончырыште лийыныт. Курчак-шамыч ик гана веле огыл кўкшын аклалтыныт.

Азалия ФАЗДАЛОВА.
Фотом еш архив гыч налме.

Курут

Ешыште поро йўла уло: пырля погынен, куруттым ыштена. Мый изинек тудым пўрдыкташ йўратем (снимкыште). Туддене шўрым нугыдемдаш, ужал кушкыл дене варен, приправе семын кучылташ лиеш. Кажне шошым полдыран шўрым шолтена. Полдыраным телылан аралаш погена. Куруттым ышташ тендамат туныктем. Тидлан кўлыт: 2 литр кефир, 2 изи совла шинчал, марле.



Кефир гыч тувыртыш вўдым чыпчыктарыза. Марлеш кодшо торыкыш шинчалым ешарыза, сайын нўштылза. Изи ўяча-влакым пўрдыктылза. Куруттым кече ваштареш але изи тулан духовкеш пенгыдеммешке коштыза.

Зульхиза ЮСУПОВА.
Башкортостан, Белорецкий, Инзер.
Фотом еш архив гыч налме.



Йоча пелен пеледалтат

*Тўналтышыже –
1-ше лаптыкыште.*

Виктория Николаевна ден Дмитрий Александрович еш пыжашыштым латкум ий ончыч чумыренит. Суртоза республикын түрлө районштыжо чоңышылан пашамышта. Озавате Аптулят ялысе йочасадыште воспитательлан тырша. Тылеч ончыч Кукнур школышто ритмике, англичан йылме уроклар вуден. Нуно кум икшывылан ош тўням пөлекленит.

Пиалышт, куанышт

Ульяна Кукнур школышто кудымшо классыште тунемеш. Тудым ме шукертак «Ямде лий» газетын поро йолташыже семын палена, чолган возкалымжлан «Марий юнкор» усталык школыштат лийын. Тудо түрлө конкурсышко ушна. «Шочмо кундем: тенгече, таче да эрла» республикысе конкурсышто, руш йылмын кечыжлан пөлеклалтше республикысе виториньште кумшо лийын. «Моя марийская земля» республикысе усталык конкурсышто кокымшо верым сенген налын. Республикысе «Конаков лудмаште» «Мыйын икымше туныктышем» теме дене

сочиненийым марла эн сайын возымыж дене чылаштым ончыттен. Яра жапыште сүретлаш йората. Кокымшо икшыве, Костя, кокымшо классым тунем пытара. Куржталаш, футбол дене модаш кумылан. Пенгыде капкылан кушкеш. Отжиманийым 38 гана ыштен кертеш! Ульяна акаж дене скакалке дене учашен тёрштылыт. Эше мурьян моткоч шўман. Гармоньым веселан шоктымым ужын, шке тунемаш кумылангын. Кочаже Александр Геннадьевич кўлеш годым ойканашым пуа. Изи шольышт, ныл ияш Алёша, йочасадыш коштеш. Тудлан акаже семынак сүретлаш келша, тыгак пластилин дене ненча. Эше пазлым писын пога.

Эре пырля

– «Марла лудына» марафонш мый кумшо гана ушненам. Книгам лудаш пеш йоратем, поснак кугу роман-влакым. Ондак утларакшым йот да руш автор-шамычын книгаштым шергалынам. А пытармыш коккум ий жапыште марий сылнымутан произведений-шамыч дек шўманьнам. Мария Илибаеван «Кугу тўня – шыгыр тўня» книгажым лудмеке, утыр кумы-

Таныгинмыт марий сылнымутан шўман улыт. «Марла лудына» марафонш еш дене ушненит (снимкыште). Ульяна ден Костя «Ямде лий» газетыште савыкталтше йомак-влакым посна чумыренит. Келшышым ойырен, куанен лудыныт.

ланьянам. Эртыше марафонш темыже йомак, легенде, преданий дене кылдалтын ыле. Йочасадыш коштышо икшыве-влак дене пырля лудына, фотомыштен, воткылыш вераңденна. Эше Костя эргым ден Ульяна ўдыремат кумыланьденам. А Алёша мемнам колыштын, – ойла Виктория Николаевна.

Таныгинмыт яра жапым пырля эртараш йоратат. Телым түрлө ўстембал модыш дене модыт, кенжежым яндар южышто лийыт, велосипед дене кудагыштыт. У ийым, Уярням, Кугечым эн кугу пайремлан шотлат. Марий кочкышым ямдылат. Пашамат тўшкан ыштат. Икшыве-влак кертмышт семын эре польшкалат.

– Ялыште илаш сай. Тымык, яндар юж. Чодыра, олык, эртерора огытыл. А шуко икшыван лияш – эн кугу пиал. Нуно мемнан пояныкна, ончыкылыкна улыт. Кажныжын койыш-шоктышыже ойыртемалтеш: кутырен, умылен мошташ кўлеш. Мыланна, ача-ава-влаклан, эн тўн – икшывына-шамыч таза, пиалан, поро чонан, кугуракым пагалыше, изиракым чаманыше, шочмо верым да йылмым аралыше кушкышт. Кугу эртертышна, мутат уке, коча-кова-влак улыт. Икшыве-влакым ончаш полшат, ой-канашымат пуат. Нунылан – кугу тау, – ойлат ача ден ава.

*Христина АЛЕКСАНДРОВА.
Фотом еш архив гыч налме.*



Мый моткоч пиалан улам! Мыйын шўжарем уло. Тудын лўмжө – Аня. Шўжарем шым ияш,

икымше кассыште тунемеш. Ме пырля модына, урокым ыштена, авалан полшена. Аня мураш, кушташ пеш тале. Тудын пелен кечыжат веселан эрта!

Шўжарем

Мый Аня шўжарем пеш чот йоратем.

*Ульяна САВИНОВА.
Волжский, Пётъял школ пеленысе Йоча усталык пөрт.*



Кок ўдыр да ик рвезе

Изирак яллесе школлаште кызыт онай сўретым вашлияш лиеш: ик классыште 3-4 йоча але шагалракат тунемеш. Кужэнгер район Ўштымбал школышто 6-шо классыште кум тунемше шинчымашым пога. Тиде Даша Сидыганова, София Мустаева да Кирилл Сидоров. Ўдыр-влакым **снимкыште** ужыда. *«Мыланна тунемаш келша, – ойлат Даша ден София. – Нимыняр йокрок огыл. Келге шинчымашым налаш утларак йөн чыла. Туныктышо-влак кажныланна тўткышым ойырен шуктат. Мўнгысў пашамат эре ыштыман. Кажне урокышто вашмутым пуаш ямде лийман».* Кум тунемше келшен ила, мероприятийышкат эре ушна.



Даша сылнымутлан шўман: почеламутым сылнын лудеш, конкурслаште усталыкшым терга. София сўретлаш йўрата, мастарлыкшым Кужэнгер посёлкысо Йоча сымкытыш школышто вианда. Кирилл – тале спортсмен, школын чапшым тагасымашлаште арала.

*Людмила ГРИГОРЬЕВА.
Авторын фотожо.*

Лудаш темлена

Серызе Елена Ильинан «Четвёртая высота» повестьшын савыкталтмыжлан 80 ий темеш. Тудын тўн геройжо – Гуля Королёва. Лўддымў ўдырлан илышыштыже тўрлў кўкшытым сенен налаш логалын. Эн нелыже нылымше. Тудо Гулям Сталинград кредалмаште 56,8 метр кўкшытан курыкышто вучен.



Немыч йоча серызе Отфрид Пройслерын «Маленький Водяной» йомакше вакш воктенысе пўян юзо тўняж дене палдара. Изи Вўдиям чытамсыр койышыжо мландымбаке шупшы. Юзо рвезым тушто мо вуча? Йомакым лудын, вашмутым палыза.

«Ваш келшен, кеч-могай йўсым сенаш, илышыште пиалым муаш лиеш», – ойла марий поэт, драматург Валерий Якимовын «Мо шергакан?» йомак-пьесыжын геройжо Мамык Пун. Йоча-влак, сылнымутым лудса да классыште мутланымашым эртарыза.

Катя СЕРГЕЕВА ямдылен.

• Ребус •



—



ла=ал



18 май – Тоштерын тўнямбал кечыже.



Йошкар-Олаште шуко музей уло. Школлатшат, йочасадлаштарат изирак тоштер-влакым келыштарат. А те, йоча-влак, тоштерыште лияш йўратеда? Тоштер – тиде тымык вер. Тушто шуко онайым

Тымык вер

ужаш да уш-акылым пойдараш лиеш. Мыланем Республикысе сўретсымыктыш тоштерыште лияш келша (**снимкыште**). Тушто тўрлў ончер эртаралтеш. Мый тиде музейыште шуко жапым эртарем. Кажне сўретым, арверым тўслен ончем. Сўретче-влакын мастарлыкыштан куанем. Нуно, чынжымак, уста улыт!

16 майыште «Тоштерыште йўд» акцияшыке ушнем.

*Ева ВИНОКУРОВА.
Йошкар-Ола,
80-ше номеран йочасад.
Фотом еш архив гыч налме.*

М. Шкетан приса
Марий кутыжманш драме театр

Марийский национальный театр
драмы им. М. Шкетана

ПЎРТЎС ЛОНГАШТЕ ПОД ОТКРЫТЫМ НЕБОМ

29 май 19:00 кутарына
Шернур район Чылдемыр ял Н. Арбан
КЕНЕЖ ЙЎД /Летняя ночь
Музыкальный комедий 2 ш. 15 н.

5 июнь 19:30 кутарына
У Торъял посёлко «Строитель» стадион А. Яковлев, С.Тимошенко
КАВАСЕ АЛАША
Музыкальный комедий /Небесный тихход 2 ш. 25 н.

12 июнь 19:30 кутарына
Волжский район Карая ял Н. Арбан
КЕНЕЖ ЙЎД /Летняя ночь
Музыкальный комедий 2 ш. 15 н.

26 июнь 19:30 кутарына
Морко район Унчо ял А. Яковлев, С.Тимошенко
КАВАСЕ АЛАША
Музыкальный комедий /Небесный тихход 2 ш. 25 н.

Рекламс.



0+

Марий Эл Республикысе «Марий Эл» увер агентстве» КАУ.
Директор – Е.И.КУЗНЕЦОВ.
Тўн редактор – А.Н.ГРИГОРЬЕВА.

Индекс П4696.
Тираж 1500 экз.
Заказ
Формат – А-4-8.

Учредитель-влак:
Марий Эл Республикысе Тўвыра, печать да калык-влакын пашашт шотышто министерстве, Марий Эл Республикысе «Марий Эл» увер агентстве» КАУ.

Редакций да издатель: Марий Эл Республикысе «Марий Эл» увер агентстве» КАУ, 424006, Йошкар-Ола, СССР Вооружённый Вийын 70-ше идалькыше урем, 20-шо порт. Тел. 8(8362) 45-22-82.

Газетым редакцийыште погымо да версталтыме, «Марий Эл Республикысе Правительствын типографийже» ООО-што ямде оригинал-макет гыч савыктыме.
Типографийын адресше: 424000, Йошкар-Ола, Комсомольский урем, 112.

Печатьыш пумы жап – 14-00, фактически – 13-00.

Авторын да редакцийын шонымашышт тўрлў лийын кертты. Серыш-влак мўнггеш огыт колталт. Ак – кутырен келшыме почеш.

https://vk.com/yamde_lii
<https://t.me/yamdელი>
yamde_lii@mail.ru
yamdელი@mediamari.ru (автор-влаклан)
Сайтын адресше: ямделий.рф

Газетым Кыл, информационный технологий да массовый коммуникаций сферым эскерыме шотышто федеральный службын Юл кундем федеральный округысо управленийыштыже регистрироватлыме.
Номер – ПИ № ТУ52-01404, 2023 ий 22 сентябрьыште пумы.

У конкурс



Милана ТРОПИШКИНА ден
Таня БЫЧКОВА.
Звенигово, Чакмарий.



Лияна ТОКПАЕВА ден
Дама ГАВРИЛОВА.
Национальный сымыктым гимназий.



Юлианна ИВАНОВА ден
Стелла ТОЙКИШКИНА.
Звенигово, Кужмарий.




Вова мате-
матике урокыш-
то «визытаным»
налын.

- Дневникет шуялте, - йодеш туныктышо.
- Мӱнгыштӱ монденам, - вавешта Вова.
- Мыйыным нал, - ойла воктеныже шинчыше Коля.

Математике дене мӱнгысӱ пашам Васялан акаже ышташ полша.

- Тыйын вич олмат уло. Кокытшыым налам гын, мынар кодем?
- Визыт. Мый иктымат ом пу, - вавешта шольо.


Келшыше ужашым кычалза.



Шотлыза.

$3 \text{ strawberries} + 2 \text{ strawberries} - 1 \text{ strawberry} = ?$
 $4 \text{ strawberries} - (2 \text{ strawberries} + 1 \text{ strawberry}) = ?$
 $(2 \text{ strawberries} + 3 \text{ strawberries}) - 2 \text{ strawberries} = ?$

Кайыкклан олма марте миен шуаш полшыза.



Сӱретым ончен чиялтыза.

